

# Berita-berita Ringkas Dari Alam Islam

## Prof. Muhammad Abdul Wahab

penyanyi dan penggubah lagu-lagu irama padang pasir yang terkenal dari sejak 50 tahun yang lalu hingga sekarang, pada tahun ini 1387 H.) telah menunaikan fardu haji ke Makkah. Abdul Wahab selamanya takut menaiki kapal terbang. Oleh itu kedatangan beliau ke Jeddah dari Mesir dengan menaiki kapal laut.

\* \* \*

**Rancangan membina dan meluaskan** bangunan Masjid al-Haram di Makkah al-Mukarramah hampir siap. Hingga sekarang wang yang telah dibelanjakan untuk rancangan tersebut berjumlah 150,000,000 riyal (seratus lima puluh juta riyal).

\* \* \*

**Satu pameran pertukangan** dan hasil bumi Indonesia akan dibuka kepada orang ramai di kota Jeddah Saudi Arabia selepas musim haji tahun ini. Pameran tersebut mengandungi 154 jenis barang-barang pertukangan yang diperbuat oleh ahli-ahli seni ukir Indonesia.

\* \* \*

**Al-Sayyid Belaid Abdessalam** Menteri Perindustrian Aljazair telah menafikan suatu tuduhan yang mengatakan bahawa syarikat minyak Aljazair (Sonatrach) yang dimiliki oleh kerajaan telah tertakluk di bawah pengaruh Amerika. Al-Sayyid Abdessalam berkata: "Syarikat minyak Aljazair tidak sekali-kali tertakluk di bawah

pengaruh mana-mana kekuasaan asing, tetapi kerajaan Aljazair hanya mengambil faedah daripada ahli teknik dan *engineer-engineer* asing yang diambil bekerja di dalam syarikat minyak Aljazair itu, di antara yang terbanyak sekali ialah dari Amerika. Ini dengan tujuan untuk melatih pekerja-pekerja bumiputera menjalankan pekerjaan-pekerjaan tersebut."

\* \* \*

## Al-Sayyid Yahya Hammouda

ketua Barisan Sukarelawan Pembebasan Palestin di dalam suatu sidang akhbar di Beirut menyatakan bahawa kecergasan perang gerila di dalam bumi-bumi Arab yang telah dirampas oleh Israel akan diperluaskan lagi sehingga merupakan perang gerila itu suatu peperangan rakyat yang dipelopori oleh seluruh rakyat Arab yang hidup tertindas di bawah cengkaman kuku besi penjajahan Israel.

\* \* \*

## Tuan Adam Malik

Menteri Luar Indonesia selama berada di Makkah al-Mukarramah kerana menunaikan fardu haji telah berkesempatan mengunjungi Istana Diraja untuk mengadakan pertemuan mahabbah dengan Duli Yang Maha Mulia Raja Faisal. Di dalam pertemuan itu beliau telah menyampaikan salam mahabbah dari seluruh rakyat Indonesia kepada seluruh rakyat 'Arabīyyah Sa'udiyyah.

\* \* \*

## al-Sayyid Muhammad Masi

*Secretary General* bagi Kementerian Luar Morocco menyatakan bahawa kerajaan Morocco dan lain-lain negara Arab sedang berusaha giat untuk mengadakan suatu lagi "sidang kemuncak negara-negara Arab". Seterusnya ia menambah kata: "Al-Malik Hasan sentiasa mengambil berat untuk mempersatukan tenaga umat Arab bagi menghadapi ancaman-ancaman Israel yang semakin hebat dan menjadi-jadi itu".

Kenyataan ini telah dibuat oleh al-Sayyid Muhammad Sidi Masi di Beirut dalam masa perjalananya ke 'Arabīyyah Sa'udiyyah pada bulan yang lalu.

\* \* \*

## Satu berita dari Baitul Maqdis

menyatakan bahawa Levi Eshkol Perdana Menteri Israel di dalam suatu sidang akhbar dengan pemberita-pemberita di luar negeri berkata: "Ia tidak yakin Russia akan campur tangan secara langsung di dalam pertikaian di antara Israel dengan negara-negara Arab. Ia tak terfikir bahawa Russia akan menyalaikan api Peperangan Dunia yang ketiga dengan sebab campur tangannya di dalam pertikaian di Timur Tengah itu."

Ia menambah kata: "Rakyat Soviet Russia telah menyamakan perbuatan orang-orang Yahudi di Palestin dengan perbuatan orang-orang Nazi di Jerman. Peperangan yang berlaku selama enam hari di Timur Tengah itu sangat tidak menyenangkan mereka. Pada hakikatnya orang-orang Yahudi tidak sekejam orang-orang Nazi yang di bawah pimpinan Hitler."

## Berita-berita Alam Islam

Seterusnya ia berkata:

“Israel akan terus berjuang untuk membuka Terusan Suez supaya dapat digunakan semula oleh kerajaan-kerajaan di dunia termasuk kerajaan Israel”: menyentuh tentang kegiatan-kegiatan gerila Arab di bumi Palestin ia berkata: “Gerila-gerila Arab di Palestin tidak akan berjaya menjalankan teknik perjuangan mereka seperti gerila-gerila Viet Cong di Vietnam, kerana keadaan iklim di Timur Tengah tidak sama dengan di Timur Jauh.

\* \* \*

**Satu siaran radio** dari Omdurman – ibu negara Sudan – menyatakan bahawa kerajaan Sudan menolak sebarang usaha damai di antara Israel dengan negara-negara Arab mengenai pertikaian di Timur Tengah. al-Sayyid Abdul Hamdi Abu Hasbu Menteri Penerangan dan Penyiaran Sudan menegaskan: “Kerajaan Sudan dengan segala angkatan bersenjatanya terletak di bawah kekuasaan negara-negara Arab bagi menentang pencerobohan-pencerobohan Israel.”

Al-Sayyid Adam Modibo Menteri Pertahanan Sudan pula berkata:

“Tentera-tentera Sudan akan disatukan dengan tentera-tentera Arab yang berkawal di sempadan Mesir jika tiba masanya kelak.”

\* \* \*

**Kerajaan Pakistan** telah mengarahkan imam-imam semua masjid di Pakistan menerangkan makna-makna bacaan al-Qur'an yang dibaca sebelum sembahyang. Semua masjid-masjid sama ada yang terletak di bawah Jabatan Wakaf atau lainnya adalah

diwajibkan mengikut perintah yang tersebut.

Kerajaan Pakistan juga memulakan rancangannya mengadakan sekolah-sekolah dan kutubkhanah di masjid-masjid dan sekarang telah merancangkan juga untuk mengadakan rumah-rumah ubat di masjid-masjid yang dikawal oleh Jabatan Wakaf.

Ketua Jabatan Wakaf, Tuan Mas'ud menyatakan bahawa kerajaan Pakistan berusaha memulihkan kedudukan ekonomi ulama-ulama dan mendudukkan mereka di tempat-tempat yang layak di dalam masyarakat. Kerajaan juga, telah merencanakan untuk menghantarkan ulama-ulama ke negara-negara Islam dan Eropah kerana tujuan-tujuan itu.

\* \* \*

**Menurut punca-punca diplomat** di Istanbul dan Kaherah (Mesir) telah meminta jasa baik kerajaan Turki untuk menghubungkan semula hubungannya dengan Iran yang telah putus pada 1961 dahulu. Ini dikatakan telah dirundingkan dalam masa kesinggahan Shah ke Turki dalam masa Menteri Luar Republik Arab Bersatu melawat Turki.

\* \* \*

**Al-Malik Faisal** telah mendermakan 10,000 pound sterling kerana menubuhan sebuah sekolah menengah Islam di Kumasi, di Ghana.

\* \* \*

**Kerajaan Australia** telah bercadang membenarkan 100,000 orang-orang Turki berhijrah ke Australia dalam masa sepuluh tahun. Sebahagian kecil orang-orang Asia yang mempunyai kelayakan-kelayakan juga dibenarkan. Yang demikian ini

dinyatakan dengan tidak menyebut bahawa perpindahan orang-orang Turki menambah orang-orang Islam di Australia – Kata majalah *Muslim World* di Karachi.

\* \* \*

**The Publition Reference Bureau** telah mentafsirkan penduduk dunia pada 1 Januari 1968 seramai 3,443 million didasarkan atas buku yang diterbitkan oleh Lembaga Bangsa “Demographic Year Book”

Penduduk dunia yang dijangka bertambah seramai 132 orang seminit mungkin akan meningkat seramai 7,000 million atau lebih pada tahun 2,000 kelak.

Hampir-hampir sepertiga daripada penduduk dunia berumur 15 tahun ke bawah.

Tujuh negara: China, India, Russia, Amerika, Pakistan, Indonesia dan Jepun – mengandungi 58 peratus penduduk dunia.

\* \* \*

### Menurut banci di Karachi

penduduknya yang berjumlah 2.2 million tahun 1960 sekarang telah menjadi 3.4 million.

\* \* \*

### Pakistan, Iran dan Turki

sedang merencanakan untuk membuat paip-paip minyak melalui Turki ke laut Mediterranean. Projek ini memakan belanja 400 million ringgit Amerika dan boleh menyalurkan minyak di antara 40 dengan 50 million tan minyak setahun. Rancangan ini dibuat adalah lebih menyelamatkan dan lebih murah perbelanjaannya daripada membawa minyak melalui Tanjung Pengharapan (Cape Town).